

Boxolo-xolo batho ba be ba rapêla Modimo ka badimo. Modimo o be o le xôna o tsebya o bopileng batho le diphôfôlô. Lebitso la ôna ba re ke 'Hwebeane a hodia 'horo. Diphôfôlô tša naxa di be di bitšwa kxomo tša xaxe. Ba re ke yêna a bopileng dithaba le mehlare dilô ka moka tšeo re di bônang di diilwe ke yêna. Ba be ba mo rapêla ka badimo e leng batswadi ba bôna ba hwileng. Leloko le lengwê le le lengwê le be le nee badimo ba lôna. Motho e moxolo xe a hwile ba re o xeroxile ba xabô ba ~~mmi~~ mmiditše. Ditetekwane le mahwana ao re a bonang le le'hono xa se ôna badimo ke batseta ba isang ditaba badimong. Badimo bôna ba di iša xo Modimo. Mathomong a ngwaxa o mong le o mong xe xo longwa dijô tše difsa xo apewa mabyalwa xo a tšewa le tšôna dijô tšeo tše byale ka marotse le tše dingwê tša išwa badimong ba bexelwa ya ba xôna di ka llewang. Pele xo moo xa ba thome, o tla kwa ba re e se ra loma. Xe ba rapela ba be ba thôma ka e moxolo ba feleletša ka e monyenyane.

Ditetekwane tšena xe motho a ka di senya kapa a di nyefola o ba le molato o moxolo. Xe motho a thswenyexa a sa bone bana mme ngaka xe e laola ya re xo xana badimo, o be a botša baxolo ba xaxe ba bitšana ka meloko ya bôna ba ya mabitleng ba mo rapêlêla mme badimo ba mo rwabalêla a atlêxa. Badimong ba be ba e ya le phôfôlô, e a hlabya ba xaša lebitla le kxosi ka madi le mešwang le nama ba e sexe ba e tloxele ke kabêlô ya badimo. Motho ya bajwang o beêlwa pheko ke ngaka, pheko ena xo rapêlwa ka yôna badimo e thšireletša molwetši baloi le malwetši ka matla ao e a fiwang ke badimo ka xobane e bewa ka taêlô ya bôna xa e bewe fêla. Ngaka xe e alafa motho e rapêla badimo ba bo yôna xo re ba e thuše e atlêxê mošomong wa yôna. Ngaka ena e thswanetše xo fa badimo kabêlô ya seo e se humanang ka bo-ngaka xo seng byalo ba tla e xalefêla ba e thlokiša mathlatse mohlomong a ba a fetêlwa ke malwetši ao a a alafang. Ka mokxwa oo ngaka e re ke dihlare tšešo le badimo. Mme xe a alafa batho o tumiša badimo babô. Ngaka e be e tšea dillô tša batho xo di iša badimong bôna ba di fetišetša xo Modimo xoba ba dula le ôna. Ngaka e ne e se na matla a xo dia selô ka ntlê le tumêlêlô ya badimo. Dintwa le masolo le matšema xe a tla laolwa xo kxopêlwa bôna mme ba ba dumêlêla.